

Date – 13/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Lawngtlai District chhung, Kakichhuah ah Tuihri ni a hriat leng mek vangin hriattheih chinah mi panga an thi tawh.
2. Naktuka Dampa bial bye- electiona vote fla te chhiar turin ruahmanna chak taka kalpui a ni.
3. Prime Minister Narendra Modia hova Union Cabinet thukhawm chuan firfiaka chetna avanga Delhi-a mi pariat thihna leh hliam tuar engemawzat awm chu an dem thu an puang.
4. Union Cabinet chuan rampawna thil thawnehhuah tilian lehzuat turin cheng vaibelchhe sing 2 sang 5 senna tur Export Promotion Mission (EPM) a pawm.

<><><>

LAWNGTLAI

Lawngtlai District chhung, Kakichhuah ah Tuihri ni a hriat leng mek vangin hriattheih chinah mi panga an thi tawh.

Kakichhuah a Hrileng vang hian Lawngtlai District Magistrate Pu Donny Lalruatsanga chuan Kakichhuah chu tlawhpawh theihloh tura kharkhipna thupek nimin khan a chhuah a, mipui chiailo tur leh damdawi lam thiamte thurawn ngaipawimawh turin a ti.

Lawngtlai Bawrhsap Pu Donny Lalruatsanga leh Chief Medical Officer Dr.Lalmuanawma Jongte te chuan Kakichhuaha Hrileng chungchang hi sawidunin, CMO chuan tun dinhmun ah he hri kai ni a hriat damlo 27 an awm tih a sawi a, Rapid Response Team din niin an thutchilh thu leh Medical Team ten Sample an lak te pawh ZMC&H ah enfiah tura thawn a nih thu Bawrhsap hi a hrilh.

VC

Kakichhuah a Hrileng vang hian Lawngtlai Dist Chief Medical Officer, Dr.Lalmuanawma Jongte chuan thuchhuah siamin, Hri hi Myanmar ram chhung, Salachhuah atanga rawnlut ni a an hriatthu leh mipui lam chu Damdawi thiamte thurawn ngaipawimawh tura a duh thu a sawi a, hri kai theihna leh darh theihna lakah mithiamte thurawn zawm tura a duh thu a tarlang.

Hetihlai hian, Young Lai Association, New Kakichhuah Branch pawn thuchhuah siamin, an khua atangin zinchhuah an khap a, Damdawi lam thiam leh an harsatna buaipuitu tur nilo chu tumah an khua a lutlo turin an ti bawh.

Lawngtlai Dist thuneituten hmalakna tur hrang hrang an sawi zingah, tui tihthianglim, a veite enkawl hmât, faina leh thianglimna chak taka kalpui a

ni a. Kakichhuah leh Salachhuah inkalpawhna kawng chu dan lailawk ni se tih a ni. Kakichhuah chu kar khat chhung atan ' containment area' ah puan ni se, Medical duty, Election duty , leh Emergency thilah lo chuan tumah luh leh chhuah phal loh ni se an ti bawk a. Damdawi tul ang angte chak taka pek ni se, hemi chhung hian Sr. CMO kaihruihana hnuaiah zirchianna kalpui ni se an ti bawk a ni.

Kakichhuaha tui hri nia hriat lêng mêk vanga thi mi 5 zinga pahnih te hi Salachhuah (Myanmar) lam niin, Pakhat hi Kakichhuah khaw mi a ni a, a dang pahnih hi raltlan - Kakichhuaha awm mek te an ni.

<><><>

YMA CCC MEETING

YMA rorelna sang, Central Co-Ordination Committe (CCC) meeting vawi 104-na chu nimin khan Aizawla Central YMA Hall, Tuikhuahtlangah neih a ni.

CCC Meeting hi Central YMA President Pu R. Langheta'n a kaihruai a, Committee member 248 an kal a, YMA khawih thu an rel zingah - YMA inkaihhruihana leh nihphung leh hruihute mawhphurhna, rampumah inzirtirna neih tur te, Mizoram chhunga hnamdang sumdawng, phalna nei lo tam ta lutuk titem tura YMA-in hma lak tur te, Mizo hmeichhia ten hnamdang pasal neih zel loh nan Central YMA in inzirtirna nasa zawka kalpui ni se tih te a tel a, Mizo infiamna te chawisan a nih theih nan Central YMA in hma la se, Zohnahthlak chi peng hrang hrang Mizoram a chengte zingah chi bil hmalakna a awm tawh loh nan Central YMA in hma la rawh se tih te a tel a ni.

Sawrkhar khawih an rorel zingah Inner Line Permit (ILP) chu tun aia khauh leh awmze nei zawka kalpui a nih theih nan YMA - in Sawrkhar - ah thlen rawh se tih te, tui hnar humhalhna dan siam tur leh Mizoram chhunga inkalpawhna kawngpui hrang hrang a chhiat avanga mipuiten harsatna kan tawk nasa lutuk thin hi a lo ziaawm theih nan Mizoram Sawrkharin tun aia chak zawkin hma la rawh se tih te chu CEC in ruahmanna a siam atan an rel bawk a ni.

Hei bakah hian CCC Meeting ah hian Palai kal te chuan tunhnaia Red Bull Tlangruam, Aizawla neih denchhena Mizo hnam lam Cheraw duhdah taka hnamdang ten an kan chu Mizo hnam lam tihbawrhanna a nih thu leh tunhnuah hetiang hi thleng tawh lo se an duh thu an sawi a ni.

<><><>

DAMPA BY POLL

Naktuka Dampa bial bye- electiona vote tla te chhiar turin ruahmanna chak taka kalpui a ni a,

Dampa bial bye election-a vote tla te hi State dang inthlang ve tho te vote chhiar rualin naktuk ni 14 ah Mamit DC conference hall ah chhiar a ni ang a, Vote chhiarna tur hian dawhkan 9 ruahman a ni.

Puan tawh angin, Dampa assembly bial-a vote thlakna khawl EVM leh document pawimawh te chu strong room ah venhimna khauh tak hnuaiah dah that a ni a. Vote tlate hi nimin khan General Observer Pu M.T Reju, IAS hovin Pu Malsawmzuala, Returning Officer room-ah neih a ni.

Returning Officer chuan Dampa bial Bye-Election neih zawh takah Election Commission of India-in ruahmanna a siamsa dungzuia endikna neih a nih thu leh nimin Dampa bial Bye-Election inthlanna neih zawh taka complain lut a awm loh thu a sawi a, Bawlte Polling Station-a VVPAT thlak ngai awm chu thlak a nih hnuah inthlanna tluang taka kalpui zui leh a nih thu a tarlang a ni.

General Observer chuan felfai leh thianghlim taka inthlanna kalpui a ni chu lawmawm a tih thu a sawi bawk.

He inthlana Vote tla zat hi zaa 83.07 a ni a, mipa vote 8921 leh Hmeichhia vote 8430 atla a , Dampa bial pumpuiah vote 20888 awmah vote hi 17351 a tla a ni.

Hruiduk polling station ah vote tla tha berin zaa 93.09 a tla a, Kea kal ngai Zopui ah chuan vote 29 awmah chawhma chungin vote 22 a tla hman veka, zaa 75.86 niin vote tlak chhiatna ber a ni thung.

Marpara North polling station ah vote thlak rei berna niin nizan dar 8 leh minute 20 vel thleng khan vote an thlak a ni.

Dampa bial bye election ah hian home voting kum upa 58, pwd 5 an vaiin mi 63, EDC mi 7 leh postal ballot mi 10 ten vote an thlak bawk.

<><><>

PUBLIC SERVICE BROADCASTING DAY

Public Service Broadcasting Day nimin khan Radio kaltlangin radio hlutna chungchangah hun hman a ni a,

He ni a India Hnam Pa Mahatma Gandhi chuan kum 1947 a New Delhi a Broadcasting House a tlawh hmasak ber leh a tlawh chhun hriatreng nana hman thin a ni.

Mizoramah pawh All India Radio chu mipuiin an hlut chho hle a, thiam sang zelah leh, khawl thil changkang chho zelah, mipui nawlpuiin an kalsan ni a hriat a nih lain, a ngaihlu tu leh thutak leh dik puanchhuahna a nih vuan tlat tu te, thu leh hla hmaih lova ngaithlatute a la nei reng a ni.

<><><>

LADC CANDIDATE

Dec ni 3-a Lai Autonomous District Council inthlanpui neihtur ah political party 3- Zoram Peoples' Movement Party, Mizo National Front leh Indian National Congress ten an Candidate tur an puang a.

ZPM chuan Aizawl a an party office ah LADC a an Candidate turte hi nimin khan puangin bial awm zawng zawng 25 chuhkim an tum a, ZPM, MDC nilai pathum chu Candidate tur zingah an tel lova, an zing ah Paithar bialtu MDC, CEM lo ni tawh Pu V.Zirsanga chu a langsar ber niin, Cheural bial leh Bungtlang South bialah pawh ZPM, MDC nilai te hnawl an ni a, ZPM hian an MDC nilai paruk chu an bial ngai theuh a ding turin an ti a ni.

Pu Lalliansawta chuan ruahmanna hmasaah chuan Lawngtlaiah ngei candidate hming puan an tum a, amaherawhchu inthlan hun puan thut anih

avang leh eng eng emaw avangin Aizawl-ah an puang ta tih sawiin, candidate thlang tur hian a hmuna awmte atangin mi 8 awmna Search Committee an din a, kum tir atang khan candidate atana tha tur uluk taka zirin ngaihtuahna an lo seng tawh a ti.

Pu Lalliansawta chuan LADC-a bial 25-ah hian din tum leh inbeisei mi 116 zet an awm a ti a, bial pakhatah mi pakhat chauh zel thlan a ngaih avangin bial chang ve ta lo an awm lo thei lo tih sawiin, Lai mipuite leh ZPM tan tang tlang a, theih tawp chhuah zel turin a sawm a, state sorkar tha taka thawhpui thei tur leh LADC nghet tha tak din turin an beisei tih a sawi bawk a ni.

MNF Party chuan bial 20 a an Candidate turte vawiin vek khan Aizawl a an party office ah an puanga, LADC a MNF in MDC an neihlai mi 11 te chu an bial ngai theuh ah an ding dawn a, Pu Lalthanmawia Colney MDC (Nominated) chu Lawngtlai AOC biala ding tura tih a ni bawk.

Hetihlai hian MDC Bial 5- Sangau East, Sangau West, Paithar, M Kawnpui, leh Sekulh ah te an la puang lo thung a, Pu Zoramthanga chuan heng biala ding tur te chu a remchan dan anga an la puan tur thu a sawi a ni.

Congress Party chuan Lawngtlai Bazar Veng a an Party Office ah an puang a, MPCC Vice President Pu Ngunlianchunga'n a thawhkhat nan Bial 25 awmna LADC ah bial 10-a an Candidate tur puangin, tun Sorkar Term kallaia CEM pawh ni tawh Pu C.Lalmuanthanga chu a bial ngai, South Lungpher a ding tura tih a ni a, vawiin lamah bial danga an Candidate turte puan chhonzawm an tum a ni.

Lawngtlai West bialtu MLA Pu Ngunlianchunga chuan LADC ah Congress an Sorkarloh apiangin Sorkar a kal mumal thei thin lova, mipuiin Congress ah rinna an nghat nasa a ti a, LADC inthlanpui ah Sorkar na an siam ngei a beisei thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia hova Union Cabinet thukhawm chuan firfiaka chetna avanga Delhi-a mi pariat thihna leh hliam tuar engemawzat awm chu an dem thu an puang. Cabinet chuan resolution pawmin Delhi-a vanduaiana thleng avanga thi an awm chu an tawrhpuithu an sawi a. Nimina Union cabinet thukhawm chuan mitthite sun nan hian minute 2 chhung ngawi renga sunna hun an hmang a ni. He hunah hian Union Cabinet cuan ramchhung mite nunna venghim turin theihtawp a chhuah dawn tih a sawi nawn a. Khua leh tui tinte himna tur leh rampum venhim hna chu ngawrh lehzuala thawh a ni ang a ti bawk.

Union Information and Broadcasting Minister Ashwini Vaishnaw chuan India-in firfiaka chetna laka ngaihnathiamna awm lo policy a neih chu Union Cabinet chuan a puang nawn leh tih a sawi a ni.

<><><>

EPM

Union Cabinet chuan rampawna thil thawnychhuah ti changtlung turin Export Promotion Mission (EPM) a pawm a. He mission atan hian cheng vaibelchhe sing 2 leh sang 5 ruahman a ni a. Union Budget 2025-26 ah khan he mission chungchang hi sawilan a ni tawh a. Rampawna thilthawnychhuah export lamah intihsiakna tha a awm theih nana ruahman niin MSME, first-time exporter leh labour-intensive sector lam tana ruahman a ni.

<><><>